

皇  
明  
典  
禮  
志

皇明典禮志卷之十一

江夏 郭

重刊

耕籍

洪武元年十月癸亥上欲舉行耕籍田禮諭廷臣曰古者天子籍田千畝以供粢盛脩餼餼自經喪亂其禮已廢上無以教下無以勸朕欲舉行爲天下勸遂命來春行之籍田在皇城南門外御耕籍位先農壇東南高三尺濶二丈五尺四出陞御耒耜三具飾以青絹御耕牛四衣以青衣洪武二年二月壬午祀先農畢太常卿奏請詣位上南向立公

侯以下應從耕者各就耕位。戶部尚書北面進來。未太常卿導上乘耒三推。戶部尚書跪受耒。太常卿請復位南面坐。三公五推。尚書九卿九推。各退就位。禮畢。還大次。應天府尹及上元江寧兩縣令率庶人終畝。是日宴勞百官耆宿於壇所。二十年二月躬耕籍田。遣官享先農禮成。宴群臣於壇所。上曰。耕籍古禮。一以供粢盛。一以勸農務本。朕舉行之。使民知勸。非事虛文。今與爾羣臣享胙於此。豈徒宴樂。正欲知重農之意。羣臣頓首謝。永樂間增定駕至籍田所。戶部尚書捧鞭跪進。教坊司官率

其屬作樂隨駕行三推禮畢駕至儀門陞座樂作  
觀三公九卿推訖教坊司用大樂百歲奏致語順  
天府官率耆老謝恩樂作樂止次百官行禮樂作  
樂止賜百官酒飯尚膳官進膳樂作百官入席教  
坊司一奏本太初之曲二奏仰大明之曲三奏民  
初生之曲徹御案樂止頓首謝駕還宣德元年二  
月上祭先農詣耕籍位三推賜宴如洪武儀調侍  
臣曰先王制籍田以奉粢盛以率天下務農貴有  
實心人君體祖宗之心念創業艱難愛恤蒼生明  
德至治達於神明則黍稷之薦不徒親耕矣農民

勤苦終歲不免饑寒輕徭薄歛貴農重穀禁止遊  
食則民趨耕稼不徒勸率之不然三推何益於事  
侍臣對曰先王制禮有本有文陛下之言宗社蒼  
生之福也弘治元年定增順天府率兩縣官耆民  
謝恩之後引上中下等農夫各十人著田間衣鞋  
各執農家器具朝見令其終畝耕畢人賜布一疋  
嘉靖十年上命墾西苑耕歛之禮隙地爲田建帝  
社帝稷壇北建殿曰天廄亭曰幽風又曰省耕曰  
省歛倉曰恒裕先二日順天府官以耒耜及種黍  
種授順天府官由午門左門出置絳輿中鼓樂送

至籍田所。至日祭社稷畢。昧爽上先農壇祭。還  
具服殿。更翼善冠黃袍。少憩。百官易便服。太常卿  
請詣耕籍位。導駕官同太常卿導上至耕籍位。南  
向立。戶部尚書進耒耜。順天府官進鞭。導駕官同  
太常卿導敎坊司官率屬作樂歌呼。左右贊相上  
秉耒三推。戶部尚書受耒耜。順天府官受鞭。太常  
卿請復位。順天府尹捧青箱隨以種播而覆之。上  
御觀耕臺。觀三公以下耕畢。從耕官各就班上詣  
齋宮陞座。從耕官暨府縣官老人各行禮。順天府  
率庶人終畝。賜百官宴勞者宿於壇傍。敎坊司大

樂隊舞田樂雜戲奏致語如儀隆慶二年耕籍先期預告奉先殿。是日還宮。仍詣奉先殿及弘孝神霄等殿恭謁。先是上諭禮部百官不必稱賀。不用鹵簿。禮部議造耕根車以載耒耜。用青質詔可。

論曰籍禮自三代以來未之能易也。籍者借也。甸師掌之。借民力也。漢耕於鎡定於弄田。於定陶於下邳。無定所。領以籍田令。丞唐戎近郊。履千畝。行九推。宋耕數十步。或十有二畦。無定數。以宰臣領大禮使總之。開創之君。注念稼穡。爲子孫法耳。我朝

高皇定禮

文皇

世皇稍潤色之。

宣皇論言。則休養生息。勤生節用。寧獨爲觀美哉。

皇明典禮志卷之十一終



皇明典禮志卷之十二

江夏 郭正域 撰

親蠶

國初無親蠶禮。嘉靖九年肅皇帝勅禮部每歲季春皇后親蠶。夕北郊。先是吏科都給事中夏言請行親蠶。厥公桑園。令有司種桑柘。以脩宮中蠶事。又勅禮部曰。耕桑重事。古者帝親耕。后親蠶。以勸天下。朕在宮中。每有稱慕。自今歲始。朕親耕。皇后親蠶。其具儀以聞。於是大學士張璁等因請於安定門外建先蠶壇。準先農壇制。壇傍設採桑壇。倣

籍田制其別殿如南郊齋宮制少減其數卽齋宮旁起蠶房爲浴蠶所。皇后採桑三條。後三公夫人採五條。列侯九卿夫人採九條。仍擇民婦受桑浴蠶於內以終事。詔如議行。詹事府詹事霍諡言皇后出郊難以越宿。且郊外別建蠶室則宮嬪命婦未得親見蠶事。勢難久行。乞擇近地便。

上曰。爾素諳禮制。何有此言。出郊古禮。非可以遠近計。若在禁內。不可垂法。已而戶部亦言安定門外近西可用。而水源不通。無浴蠶所。初禮部議於皇城內南城西苑中。有光祿瓊島之水。且唐制亦在

苑中。宋亦於宮中。亦從禮部初議便。

上曰。周禮之制。耕蠶分南北郊。唐人固陋不可法。廼論禮部曰。疑謀勿成。中心未決之事。不必其成。親蠶禮朕心決之久矣。韜奏一出。必有藉彼爲言。破政害事。禮樂制度。自天子出。今非朕者有五。曰我太祖範則已定。汝何增加一也。列聖不議。汝何擅創。二也。

皇后午門不敢出。而可遠出北郊。三也。

太祖豈不知此。何待汝爲。非作聰明而何。四也。宮中有累朝未聞之語。或有感額者。五也。舍此必以禍。

福有恐。今以此刻布中外。各以令所見具陳。於是禮部尚書李時等言。大明門出至安定門外道路遠。今日鳳輦或由東華玄武二門出。無礙於古禮。臣等條爲四事以請。一增治綱之禮。繭成後。令內臣自北郊捧獻宮中。仍於宮中隙地量立蠶綱織室。行三盆之禮。以終蠶事。二定壇壝之向。先蠶壇北向。採桑壇東向。如唐開元之制。三定採桑之器。唐制尚功奉金鈎。夫親蠶以識女工之艱難。金鈎侈矣。宜令造辦筐鈎。止如民間器用。毋過雕飾。四擇掌壇之官。中宮出郊禮儀。令內臣謹愿者掌之。

以肅宮闈之禁。

上嘉納之曰。

皇后有事先蠶宜於玄武門出。儀衛令內使陳列兵衛官軍一萬員名。五千圍於壇所。五千護於道。仍擇西苑隙地。織室壇制。準先農而殺其十之一。數用偶。不必建齋宮。止建具服殿。蠶室繭館。俱如古制。於是築親蠶壇於安定門外。

嘉靖九年先期。欽天監擇日。順天府具蠶什物給送蠶母。順天府進蠶種。及鈎筐一副。自西華門出。置綵輿鼓樂。送至蠶室。蠶母浴種。伺蠶生。先飼以待。

先一日蠶宮令丞設。

皇后採桑位於採桑臺東向。執鉤筐者位稍東。設公主及內命婦位於

皇后位東。設外命婦位於臺陞之下。北向西上。至日四更宿衛陳兵衛。女樂備樂司設監備儀仗及重翟車。蠶宮令備鉤筐俱候於西華門外。內執事女樂生并司贊六尚女官等皆乘車先至壇內候將明內侍詣坤寧宮請

皇后詣先蠶壇

皇后服常服。女官導出宮門乘肩輿。公主以下各服

其服以從。至西華門內降輿。陞重翟車。女官捧鈞筐於車前。

皇后至具服殿。易禮服。祭先蠶。祭畢更常服。司賓導公命婦。先詣採桑臺。南北向。女侍執鈞筐從。尚儀請詣採桑。女官導。

皇后至採桑位。東向。公主以下各南北向。執鈞者進鈞。執筐者奉筐。皇后採桑三條。還壇南儀門坐。觀命婦採。三公命婦五條。列候九卿命婦九條。各以筐授女侍。司賓導內命婦一人詣蠶室。尚功帥執鈞筐者。從尚功以桑授蠶母。蠶母受桑。縷切之。以

授內命婦。內命婦食蠶瀝箔。司賓導內命婦還禮畢。皇后還具服殿。陞座。司賓率蠶母行禮。司贊唱班。外命婦序列四拜。賜宴於殿內外。并賜蠶母酒食於採桑臺傍。公主及內命婦殿內序坐。外命婦從二品以上。三品以下。臺下各序坐。教坊司女樂奏樂如儀。宴畢徹案。公主以下。并外命婦各就班。司贊贊四拜禮畢。皇后興還宮。導從如前。四月禮部以蠶事告成。請行治繭禮。令於蠶婦中選能織絲及能織者各十人。欽天監卜吉日。

皇后出宮警蹕導從如常儀至織室。命內命婦一人。



行三盆手禮。禮畢。遂布於織婦。以終其事。其所織完蠶絲。令織婦織於織室。蠶宮令送尚衣織染監局造祭服。十年以出入不便。三月己丑上幸西苑。召大學張孚敬。尚書李時。至太液池。令中官以舟渡二臣。諭以築蠶壇相地。遂改築壇於西苑。壇高二尺六寸。四出陛廣六尺四寸。東爲採桑臺。方一丈四尺。高二尺四寸。三出陛。鋪甃如壇制。臺之左右樹以桑。東爲具服殿。北爲蠶室。又爲從室。以居蠶婦。設蠶宮署於宮左。置蠶宮令一員。丞二員。擇內臣謹恪者爲之。以督蠶桑等物。十四年。

皇后親蠶於內苑如儀。

上日親耕無賀蠶其母賀女樂第用以宴勿前導。

論曰古之天子諸侯必有公桑蠶室近水築宮棘  
墻外閉君皮弁而卜三宮之吉者使入蠶室中春  
后帥內外命婦蠶於北郊具曲植籩箱東鄉躬桑  
世婦卒事孟夏后妃獻繭收繭稅以桑爲均貴賤  
長幼如一以給郊廟之服季夏命婦官築采爲文  
章以祀先王敬之至也歲終比其小大麤良而嬪  
婦絲枲之職屬於太宰若此其重也周於北郊以  
統陰也漢以東郊以蠶生也晉以西郊方藉田也

唐於苑中。便出入也。宋於東郊。用漢制也。  
世皇毅然舉曠典。明周制。禋祀龍精。登薦鞠衣。化先  
椒闥。衣被寰中。條矣。

皇明典禮志卷之十二終

皇明典禮志卷之十二

皇明典禮志卷之十三

江夏 郭正域 撰

經筵

國初經筵無定日講亦無定所正統初始著爲儀  
常以月之二日御 文華殿進講月三次寒暑暫  
輟勅勲臣一人知經筵事內閣學士或知或同知  
經筵事六部尚書左右都御史通政使大理寺卿  
及學士等官侍班翰林院春坊及國子監祭酒等  
官二人進講翰林春坊等官二人展書給事中御  
史各二人侍儀鴻臚寺錦衣衛堂上官各一人供

事。鴻臚寺鳴贊一人贊禮。序班四人舉案。勲臣或駙馬一人領將軍侍衛。禮部擇吉日以請。先日直殿內。臣設御案於御座東稍南。設講案南稍東。是日早。司禮監先陳所講經書各一帙。置御案一帙。置講案。講官二人各撰講義置帙中。上早朝畢。御文華殿。鴻臚寺官引知經筵及侍班講讀執事侍儀等官於丹陛上五拜三叩首。以次上殿。東西序立。侍儀官於殿內分東西北向立。序班二人舉御案。二人舉講案。鴻臚寺官贊進講。講官一從東班出一從西班出。詣講案北向並立。贊拜興。翰林執

事官一從東班出詣御案展書退立於東講官進至講案奏講某書講畢退展書官復詣前捲書退立於東廊下又執事官一從西班出詣御案展經退立於西稍南講官進至講案奏講某經或某史講畢退仍並立執事官復詣前捲經退於西廊下鴻臚寺贊官拜興各退就東西展書官隨之序班舉御案舉講案禮畢命賜酒飯各官跪承旨出

### 日講

正統元年二月定日講儀上御文華殿內閣學士侍班不用侍衛侍儀執事凡日講官或四或六開讀

初吉服。五拜三稽首。後常服。止一拜三稽首。先一日進講義。其日講讀官先日直房候駕出。內官傳宣入文華殿閣。臣於屏左右。講官於東西暖閣門南。各東西立。少選閣臣進屏內。講官進屏南。仍東西立。候上口宣先生來。同承旨入稽首。東西立。讀書者先至御前一揖。向左盤旋二步。至案展書。壓金尺。或壓兩傍。或直或豎。執牙籤讀五過。掩書。一揖退。讀經者亦如之。以次進講。進退之節。皆如讀儀講畢。壓金尺。盤旋二步。一揖退。文華殿賜茶。文華門賜酒飯。一拜三叩首。酒飯後。俟進字畢。進講。

史書如前儀講畢。一拜三叩首。一揖。候上出案。舉手北向一揖。時上日御文華殿。誦書講學。至午後回宮。弘治間。

孝宗皇帝。每日講二次。弘治十八年。

武宗皇帝即位。大學士劉從等進日講儀曰。

皇上在春宮講論語尚書。各未終卷。請續講讀。講讀退。

皇上裁決政務。有暇臨古法帖。俟午講時。臣等恭閱。近午初時。講大學衍義。歷代通鑑。或聖心有疑。卽問。得旨舉行。正德元年九月。司禮監傳示。欲免午



講閣臣劉健等疏陳不可。經書固聖賢大道。通鑑乃古人事跡。請如舊。每日進講二次。

上曰。已知之。嘉靖六年。每月之三日。八日。用日講官二人。講大學衍義。閣臣一人侍。賜茶酒飯。如日講儀。隆慶六年。每日早。閣臣及講官講畢。各退。

上進煖閣少憩。司禮監將章奏進覽。閣臣等進西房候。

上諮問。卽召至御前。敷陳疏中事情。已廼率領正字官。恭侍。

上還宮。

隆慶間每日視朝畢。卽御講筵。萬曆後以三六九日視朝不講。餘日冬夏不輟。萬曆九年閣臣請章奏重大事情。先進後殿面陳。及講。

祖宗訓錄。出仍同講官進講史書。

### 無逸殿講儀

嘉靖十年定。先一日司該監官于無逸殿設御座御案。及講案。如文華殿月講之儀。是日質明。

上具常服乘輦至無逸殿門。眾官門外迎候。

上降輦。乘板輿至殿內。降輿陞御座。鴻臚贊拜。各官于殿門外。一拜三叩首入殿內。東西序立。序班舉

御案置御座二。舉講案置殿內門西東向設座位。  
鴻臚寺贊進講。大學士一員出班稽首禮。

上命賜坐。承旨稽首。展書官詣前展講義。退。講官坐  
講畢。展書掩講義。講官稽首復班。又大學士一員  
出班。承旨坐講如前儀。序班舉御案。舉講案退。禮  
畢。有旨賜宴。衆官承旨退至幽風亭前迎候。  
上乘板輿。至亭內降輿。陞御座賜宴。

論曰

高皇帝干戈未戢。文德先陳。軍旅之際。延召名儒。如  
戊戌之春。卽召儒士許元。葉瓚。玉胡。翰汪。仲山。李

公常金信徐革童冀吳履張啟敬孫履會食寧越  
行中書省日令二人進講經史敷陳王道卽位之  
後大開講筵靡間寒暑時發宏議覃爲訏謨有老  
師聞人所不能窺一斑者如

洪武三年二月御東閣翰林學士宋濂待制王禕等  
進講大學傳之有土有人章

上曰人者國之本德者身之本人主有德則人歸之  
如就父母有土有財自然之理德不足以懷衆雖  
有財何用哉十六年六月御謹身殿東閣大學士  
吳沉等講周書國則罔有立政用儉人

上曰國家不可有小人。有小人必敗君子。故唐虞任禹稷。必去四凶。魯用仲尼。必去少正卯。不幸有小人。如畜毒藥。不急去之。必爲身患。小人巧于悅上。忍于賊下。人君若喜其順適。任其所爲。而不問以爲怨將在彼。譬如犬馬傷人。人不怨畜犬馬者乎。沉曰。小人中懷奸邪。而其所言甚似忠信。不可不察。

上曰。然。小人喜于逢迎。彼知人主所樂。不顧非義。乃傳會曰。是可爲。知人主不樂爲者。不顧天下國家。亦傳會曰。是不可爲。自古知人爲難。知言亦不易。

也。十八年五月，御華蓋殿，大學士朱善進讀心箴畢。

上曰：人心道心有倚伏之幾，蓋仁愛之心生，則忮害之心息；正直之心存，則邪諛之心消；羞惡之心形，則貪鄙之心絕；忠慤之心萌，則巧僞之心伏。故人常持此心，不爲情欲所蔽，則至公無私，自無物我之累。九月，命大學士朱善講周易至家人。

上曰：齊家治國，其理無二。使家長幼內外各盡其分，事事循理，則一家治矣。達之一國天下，舉而措之，朕觀其要，只在誠實而威嚴，誠則篤親愛之恩，嚴

則無閨門之失。二十年五月

上御華蓋殿。侍臣進講。因論人之善惡。感召不得其常。

上曰。爲惡或免禍。然無可爲之惡。爲善或未蒙福。然無不可爲之善。人惟修其在已。禍福聽天。彼不然者。時未至耳。二十六年秋七月。選秀才張宗濬等。俾隨詹事府左右春坊官分班入直文華殿。侍講畢。進說民間利害。田里稼穡等事。間陳古今孝弟忠信。文學材藝諸故事。日以爲常。二十八年十一月。侍臣進講。尚書無逸。

上曰國家以勤與以逸廢勤與逸理亂所繫成王時天下晏然周公作是書上自天命下至生民間里怨詛莫不具載朕每反覆詳味求古人之用心書於殿壁朝夕省閱以爲鑒戒今日聞之愈益警惕文皇表章經學時抒藻思永樂二年八月大學士解縉等進大學正心章講義

上覽之至再曰人心不可有所好樂一有好樂泥而不返則慾必勝理若心能靜虛事來則應事去如明鏡止水自然純是天理朕每朝退默坐未嘗不思管束此心又思爲人君者但于宮室車馬服食



玩好無所增加。則天下自然無事。

列聖相承。崇師重道。

宣皇篤竟簡編。丕隆著述。細丹之談。流爲琬琰。宣德二年三月。

上御文華殿。儒臣講孟子。

上曰。伯夷太公皆歸文王。武王伐紂。太公佐之。伯夷扣馬。見何不同。太公心在當時。伯夷心在萬世。無非爲天下計也。二年冬十月。

上御文華殿。儒臣進講易觀大象畢。

上曰。古者帝王巡狩禮。後世何以不行。亦世勢不同。

也。舜時五載一巡。夏二月東嶽五月南嶽八月西  
岳十一月北岳。一年遍天下。五年又去。後世人君  
一出千乘萬騎。百姓供億。不亦難乎。成周十二年  
一巡。已與虞時不同。況後世乎。予以爲治貴實效。  
誠如古帝王選任賢良。撫養百姓。崇德報功。畢協  
至公。不患制度不一。民風不振。若以後世侍衛之  
衆。征求之廣。欲行時巡之禮。難矣。二年十二月侍  
臣進講貞觀政要。

上曰。唐太宗致治之美。庶幾成康。實本乎此。予謂安  
天下必先正身。未有身正而形曲。上理而下亂者。

治國猶栽樹本不搖枝葉茂盛君道清靜百姓安樂皆要語也三年二月

上御文華殿儒臣講舜典畢

上曰觀二典三謨則知萬世君臣爲治之道不出乎此以閏月定四時天道以明莫高山大川分別九州任土作貢地道以成克明協德協和萬邦人道以建九官十二牧後世建官不同不出乎此當時君臣都俞吁咈更相告戒用圖治功氣象藹然何後世之不及也三年冬十月儒臣進講春秋畢上曰聖人匡世之功憂世之心備見此書當時先王

禮樂法度日廢。亂臣賊子接迹而起。有此書而後天下皆知尊周。又曰。孔子以尊周爲本。孟子乃以王天下勸齊梁何也。聖賢之心。無非爲天下計。孟子時不有王者興。何以解生民之塗炭。遂賜講官坐。命左右賜果茗。六年三月。

上御便殿。命翰林儒臣進講講大學平天下章畢。

上曰。治天下不可無財用。如生之衆。四語不必征暴橫歛。而國用有餘矣。又曰。秦誓曲盡君子小人情狀。人君審此。則好惡用舍當矣。漢唐中葉。小人倖位。妨賢病國。卒爲厲階。聖賢之言。萬世龜鑑。九年。

十一月翰林侍臣講周書畢

上因論周之王業及成康治效曰當時皆以周之不造及成王定奄平淮東土始寧繼得罪人又大雷電以風王迎周公歸遷殷頑民而王室以安自是刑措四十餘年歷代八百則知始之震撼正天以維持鞏固之也譬如人之身不幸有疾加意調治所以培固元氣克臻壽考天之所定豈偶然哉

孝皇虛懷聽納天語叮嚀惟恐不盡

弘治十七年九月召大學士劉健等至煖閣諭曰昨令李榮諭日講官陳善開邪陳宇當作敷陳又言

他字未當不若啓沃之然不必深已。須直言無諱。道理皆書中本有。非是自撰。若不說盡終無進益。論思輔導皆所當言。可諭講官不必顧忌。昨似有顧忌耳。是日天顏甚悅。恐因此有所觀望。故特示詳悉如此。

弘治十八年三月張元禎上疏勸經筵講太極圖西銘性理諸書。

上嘉納之。索太極圖一觀曰。天生此人一開朕也。世皇銳意典謨。既以無逸名殿。時灑宸章。刊爲註疏。四年十一月

皇明通志卷之十三  
上謂無逸一篇。

聖祖御序洪範均治天下之法。因命輔弼臣撰序刊布。已復再註尚書。名曰三要。六年五月諭內閣令講官及翰林官。日輪一員。將經史有關德政及與修省之道者。各錄其義。贊所未曉。大學衍義可宜直解。叅以時事。以開朕學。六年十月

上以日講論語。曾子有疾章。諭諸臣無忌。還當補講。又以講官董玘行立無讓之體。令輔臣諭之。玘自是見。

上屏息。

上謂其知改令供職既侍讀汪佃講洪範九疇不稱  
旨。

上親講解其義謂輔臣曰人君盡倫理于上萬姓化  
于下倫序明而道大備福將自至以佃講讀遲鈍  
令吏部改調外任因命內閣選程翰林諸臣稱職  
者留用不稱者量材除他官三月

上御經筵國子監祭酒陸深奏講章爲內閣所改。  
上曰此故事也汝有所見當別疏具聞若任已意必  
有雜說以亂理學。

上幸西苑御無逸殿命大學士李時翟奎坐講時講



無逸。銓講幽風七月。賜輔臣及翰儒臣宴幽風亭下。

上曰。此雖觀耕之所。亦勤學所寓。昨舉落成之禮。因命輔臣進講。賜卿等宴。卿等當協心匡輔。以濟太和。十一年九月。講官侍讀學士吳惠郭維藩進講。既退。

上諭輔臣李時等曰。講官惠言省無益之費。停得已之役。維藩言去操切更張之弊。務淳厚博大之體者。云何。卿等以朕意問之。有可補救時宜者。令條列以對。于是惠疏言。方今民窮財竭。而宮殿興作。

不已。採木燒磚。大爲川廣蘇常之患。此宜停罷。各省歲辦物料。宜勅有司。准以折色解京。從宜置辦。毋使民困於徵解之苦。此宜節省。且謂自鹽法阻壞。糧草改折。諸邊積貯空虛。宜減價惠商。疏通餘塩。其輪邊糧草。可仍復本色。以爲足國經久之計。維藩疏言。今者士風漸漓。一切好更張。以取聲譽。以譟張爲變通。安靜爲迂腐。嚴急爲才幹。寬厚爲無能。好惡任情。不以爲耻。如此則俗薄而政龐。非細故也。宜申飭臣工。崇本實。修職業。乞于各衙門條陳之言。擇其籌慮深長。事可經久者。方賜施行。

毋徇操切之論。求人過甚。立法太嚴。庶幾養成惇大之俗。且請復庶吉士之選。以育人才。停選貢之例。以疏壅滯。疏上。各報聞。二臣頗有所指切。上亦不罪也。十二年十月。禮部尚書夏言以學士進講。上製聞篇賜之講。大抵國家典制。經筵于殿中。日講于殿後。經筵講官凡十有六。詞臣皆得與。日講講官惟六。不輕與。經筵日輪二員。而日講日輪二員。經筵惟月之二日。又祁寒暑雨皆罷。日講不間寒暑。經筵講官執講義以進。日講則講官執牙籤。近御前口授。經筵用侍班侍儀諸臣。日講獨閣臣與講。

臣耳。經筵上稱官人。日講稱先生。經筵其禮繁。其數曠。日講其體親。其功專。旒纁尊嚴。不廢諷誨。勞務勞勩。不厭詩書。稱爲先生而不名。起立拱手而不爲屈。直陳時事而不諱。敷奏興衰而不爲忌。詩曰。緝熙光明。書曰。厥修乃來。聖子神孫。日新又新。當勿替引之矣。

皇明興禮志卷之十三終

皇明典禮志卷之十四

江夏 郭正域 撰

東宮出閣

洪武元年十一月建大本堂。取古今圖書充其中。延四方名儒教太子諸王。分番夜直。選才俊之士充伴讀。上時時賜宴。賜詩商確古今。評論文字。無虛日。

天順二年三月定是日早。禮部鴻臚寺執事官于文華後殿四拜。請東宮陞文華殿三師三少。并官僚于丹陛上四拜。以次退出。內侍導東宮至後殿。

今有先生來內侍以書案進侍班侍讀講官入一拜  
東西立內侍展書先讀書侍讀官前伴讀退復班  
次讀經或史侍讀官前伴讀讀畢退已時侍班侍  
講讀及侍書官俟陞座入內侍展書先侍講官進  
講書退班次講經史侍書官前侍習字開說點畫  
退午膳後或習騎射凡習寫字春夏秋百字冬日  
五十字凡是年以

上御文華殿閱奏牘避居殿之東廂

隆慶六年增定是日早侍衛侍儀如常儀內侍先設  
皇太子座于文華殿之東房正中西向設書案于座

之左。

皇太子出東陞座。提調輔臣并侍班講讀官以次序立丹墀四拜。以次入相向立。通事舍人以講案進。內侍展書。侍讀官進讀。侍講官進講。通事舍人徹案。命賜酒飯。各官即首退。又東宮初講之時。閣臣侍五日。後每月三。八。日一至。先拜出。然後各官入供事。

論曰。太子天下本。八歲入小學。學小藝。履小節。束髮就大學。學大藝。履大節。承師問道。太傅罰其不則。而達其不及。與國之人齒。曰。將君我。而與我齒。

君在則禮然。唐時皇子執篋壺酒脩案服。學生之服以見先生曰。某方受業于先生。某不敢視賓客。跪而奠篋。博士答再拜。宋制。

皇太子位于殿東階下。師傅保位于殿西階西。三少位于南俱東向北上。皇太子再拜。師傅保以下荅拜。猶有三代之遺焉。

高皇天縱神聖。注意凝承。輔導國本。慨然遠覽。謂三師先達不宜倨坐。受先生拜揖。下明詔議禮。一時廷臣未能推廣德意。僅復其半。然猶有三師諭德分庭之意。事在集禮繪圖可考。天順而後。議禮者



不能修舉故事一切以相臨之意行之自輔弼而下蒲伏拜跪傳宣唯諾彷彿至尊遂至無以加蓋非洪武之舊矣古人有言左右正則太子正前有與計而後有與慮自高皇開大本堂以來列聖宮寮燦然可觀也戊寅劉基陶安言于

太祖曰適聞中書及都督府議倣元制設中書令欲奏以太子爲之

太祖曰取法于古必擇其善元氏胡人事不師古設官不以賢惟其類吾子年未長學未充更事未多所宜尊禮師傳講習經傳博通古今他日軍國重

務皆令啓聞何必中書令乎乃命詹同取東宮官制觀之謂同等曰朕令立東宮官以廷臣勲德老成兼其職老成舊人動有典則新進之賢擇衆用同對曰

陛下立法垂憲意深遠於是矣

洪武元年正月以李善長爲太子少師兼詹事馮勝兼少詹事楊憲傳璪兼府丞徐達兼太子少傅常遇春兼太子少保鄧愈湯和兼諭德章溢兼贊善劉基兼率更令三月以劉基爲御史中丞兼太子贊善十月以梁貞王儀爲太子賓客秦鏞盧德明

張昌爲太子諭德。上曰。朕命卿等輔導太子。必先  
養其德性。使進于高明。然後于帝王之道。禮樂之  
教。及往古成敗。民間稼穡。朝女論說。日聞讜言。使  
無非僻之干。積久以化。他日爲政。自然合道。卿等  
勉之。十一月辛丑。命諸儒作鐘山龍蟠賦。置酒驩  
宴。御製時雪賦。安東官宦及備者各賜袍服。

洪武二年四月。命博士孔克仁等授諸子經。定東  
宮官屬之制。五年十二月。復以宋濂爲太子贊善。  
六年七月。以儒士桂彥良爲太子正字。十年十二  
月上。諭李善長等曰。人君聰明。雖自天性。然物理

必察識而後知。人情必諳練而後熟。若臨事不熟。驟然斷決。恐未盡善。既行之後。覺其非而欲改之。妨事已多。前者令皇太子躬奏朝臣啓事。練習國政。恐聽覽之際。處置未當。自今政事啓于東宮者。卿等二三大臣。更爲叅決可否。二十五年九月。以馮勝傳友德。李景隆。藍玉。詹徽。茹瑄。任亨泰。杜澤。楚樟。唐鐸。楊靖。皆兼東宮師傅等官。正月丙戌。上御文樓。太子侍。

上問近講經史何事。對曰。昨講漢書。七國叛漢。

上曰。孰曲孰直。對曰。曲在七國。

上曰此講官一偏之說宜言景帝爲太子時常校博局發吳王世子以徵其然及爲帝又聽晁錯之說輕意黜削諸侯土地七國之變實由于此若爲諸子講此則當言藩王必上尊天子下撫百姓無橈公法如此則爲太子者知隆親親之恩爲諸子者知盡君臣之義三年四月丙申

上召東宮官屬及王府官屬諭之曰輔導之臣由法度之器先正己而後正人蓋德義者正人之法度善惡者修身之衡鑑汝觀之梓匠雖有材木必加繩削乃能成器太子諸王必得賢輔開導贊助乃

能成德。古人已行之事。可爲鑒戒者。采摭編次。朝夕觀覽。以廣知識。亦有助於輔導。羣臣頓首謝。復  
願謂劉基等曰。古賢聖之君。不忘修省。富貴易驕。  
必至於荒縱。未有不覆。基頓首曰。

陛下此言。萬世之福也。六年九月己卯。命諸司常事。  
啓皇太子。重事乃奏聞。

上謂皇太子曰。人君統天下。人情物理。必在周知。然  
後臨事不惑。吾自起田里。至于今日。凡治軍旅。理  
民事。無不盡心。恒慮故嘗深念。古人爲治。必廣視  
聽。凡言之善者。卽行之。不善者。雖不行。亦思繹至。

再果不可。然後置之。夫慮事貴明。處事貴斷。庶幾  
不眩。汝生長宮掖。未涉世故。若局于見聞。則視聽  
不廣。且目雖能視。不踰于闕耳。雖能聽。不越于庭  
而欲天下之務。一一當理。難矣。汝宜親賢樂善。以  
廣聰明。逆言必求其善。順言必審其非。汝其敬之。  
七年正月乙亥。

上召太子宮臣諭之曰。汝知重器乎。對曰。商彝周鼎。  
太祖曰。非也。太子天下重器。人有羹鼎。尚知寶愛。太  
子主器之重。寶愛之者。必擇端人爲輔。朝夕與居。  
使熟聞善言。不邇諛行。以成其德。若委之便嬖近

習是委重器于塗矣。汝等日輔太子。講論誦說。必導之以正。使其道明德立。才器充廣。庶幾他日克勝重任。以副朕望。

洪武九年正月丁巳。太子諸王侍。

上曰。汝等聞修德進賢之道乎。太子對曰。儒臣講說。知其略矣。未領其要。

太祖曰。藻率雜佩。爲身之容。恭遜溫良。爲德之容。見于外者。可以知內。古之君子。趨蹌有節。升降有數。周旋跬步。不違矩度者。其德充也已。德既修。足以服人賢者彙進。不肖者自去。天下國家。未有不治。



不知務此。鮮不敗矣。夫貨財聲色。戕德之斧斤。讒佞諂諛。杜賢之荆棘。當拒之如虎狼。避之如蛇虺。溺于所好。必爲其所陷。汝等慎之。

洪武十二年三月戊辰

上御華蓋殿。皇太子侍。

上曰。比誦何書。對曰。商周之書。

上曰。誦書亦知古君道否。君道以事天愛民爲重。其本在敬身。人君一言一行。上通于天下。繫于民敬。以將之。而後無不善。善天必鑒之。不善天亦鑒之。一言善四海蒙福。一行不謹。四海罹殃。可不敬乎。

永樂二年夏四月壬申命僧錄司左善世道衍爲太子少師復其姓姚賜名廣孝賜勅諭曰卿秉性篤實學行老成今建儲嗣簡求賢輔以卿舊人特授太子少師夫太子天下之本必賴啓迪匡正輔成德器尚勉盡厥職副朕眷倚之重又命禮部尚書李至剛兼左春坊大學士陞翰林院侍讀學士解縉爲本院學士兼右春坊大學士翰林院侍讀黃淮爲左庶子胡廣右庶子胡儼左諭德皆仍兼侍讀翰林院侍講楊榮右諭德仍兼侍講以翰林院侍講楊士奇兼左春坊左中允改北京刑部主事

尹昌隆爲左中允。陞翰林院修撰。李貫右春坊右中允。仍兼修撰。命吏部左侍郎許思溫兼左春坊贊善。陞翰林院編修陳仲完左贊善。仍兼編修。檢討王汝玉爲右春坊右贊善。仍兼檢討。陞國子博士徐善述監察御史王子沂。俱爲左春坊左司直郎。國子助教晁鑄。刑科給事中王文貴。俱爲右春坊右司直郎。刑部司務楊正爲左春坊清紀郎。國子博士楊斌右春坊右清紀郎。教授程僖。教諭黃貫俱左春坊司諫。教諭張詳。梁艮俱右春坊司諫。陞翰林院編修楊溥中書舍人姚友直俱爲司經

局洗馬。溥仍兼編修。戶科給事中吳牧兼司經局校書。吏科給事中梁質兼司經局正字。陞教諭劉真爲校書。訓道王雅爲正字。

天順二年三月吏部禮部會翰林院選擬

皇太子出閣侍班講讀等官以聞。侍班官則吏部尚書兼學士李賢。日侍不更。太常寺少卿兼學士彭時。翰林院學士呂原。更侍。詹事府詹事陳文。少詹事劉鉉。日侍不更。翰林院學士林文。李紹。劉定之。侍讀學士錢溥。更侍講讀官。翰林院學士倪謙。尚寶司卿兼侍講黃諫。尚寶司司丞兼編修萬安。尚

寶司司丞兼編修李泰左春坊左中允孫賢右春坊右中允劉琬左春坊左贊善王綸右春坊右贊善司馬恂八人更侍四人一日侍書官太常寺少卿黃采中書舍人兼正字吳謙二人更侍

成化十四年二月戊申

皇太子出閣進學命大學士萬安戶部尚書劉翊禮部尚書劉吉提調講讀翰林院學士王獻詹事府少詹事黎淳翰林學士謝一夔右庶子汪諧洗馬鄭環羅璟更番侍班學士彭華侍讀學士江朝宗左庶子劉健左諭德程敏政侍讀周經修撰陸錢

張昇張頤更番講讀經改左中允昇改左贊善修撰傅翰兼校書太常寺少卿謝字禮部員外郎凌暉兼正字通事舍人選除二員翌日改鴻臚寺序班耿寧紀本爲之

弘治十一年二月甲午大學士徐溥等以皇太子將出閣講學請以太常寺卿兼翰林院侍講學士程敏政侍講學士楊守卬左春坊諭德李旻司經局洗馬梁儲充侍班官太常寺少卿兼侍讀學士李傑太常寺少卿兼侍講學士焦芳侍讀學士兼左諭德王鏊右諭德王華沈馬楊傑侍讀劉機江瀾

白鉞侍講武衛左中允楊廷和右中允張天瑞左  
贊善費寵充講讀官編修兼校書吳儼靳貴禮部  
員外郎兼正字周文通大理寺右寺副兼正字劉  
槃俱更直供事又請改敘政爲詹事兼學士陞鰲  
爲少詹事兼侍讀學士

上俱從之仍命溥及大學士劉健李東陽謝遷提各  
官講讀

嘉靖三十一年八月甲子命翰林院編修高拱檢討  
陳以勤充裕王講讀官伴讀改國子監助教尹樂  
舜鄭守德俱翰林院待詔侍書中書舍人吳鼎吳

應鳳三十二年二月丁卯

上諭大學士嚴嵩等曰二王講讀朕聞昨秋止將尚書過口二三豈成學業還自書入經先讀大學熟記徹講續以中庸卿等點字若何昔仰荷

皇考恩教于至慈之中朕不用力今日何事克善不令力學又悞矣嵩等對曰

皇上追念

皇考訓思令二王殿下力學臣等不勝欽仰先書入經乃聖賢教人次弟臣等去秋所進書程據舊儀以大學與尚書每日並讀並講當導諭行



隆慶六年二月以

東官出閣。命禮部尚書高儀、吏部侍郎張四維、洗馬  
余有丁、贊善陳棟充侍班官。少詹事馬自強、陶大  
臨、編修陳經邦、何洛文、檢討沈經、張秩充講讀官。  
檢討沈淵、許國充校書官。制勅房辦事。大理寺左  
寺丞馬繼文、徐繼申充侍書官。

皇長孫讀書

永樂五年夏四月辛卯，皇長孫出閣就學。

上召太子少師姚廣孝、翰林院待詔魯瑄、鄭禮等諭  
之曰：人于學問，常以先入之言爲主。朕長孫天資

明睿爾等宜盡心開導。凡經史所載孝弟仁義與夫帝王大訓。可以經綸天下者。日與講說。浸積久。涵養深。則德性純。而器識廣。他日所資甚大。不必如儒生繹章句。工文辭爲能也。廣孝等稽首受命。賜金織羅衣各一襲。命大官給旦暮酒饌。甲午召前禮部儀制司郎兼右春坊右贊善李繼鼎至。復以爲右贊善。命侍皇長孫說書。

親王讀書

書堂在皇極門右房。講官以部臣或進士改翰林官充之。

皇明典禮志卷之十四終